

光緒山西通志

金石記五

記五之五

山西通志弟九十三

賜進士出身頭品頂戴兵部侍郎兼都察院右副都御史巡撫山西提督軍務旨監修張煦奉

唐

碑碣

唐元和至天佑五代後唐

晉

漢

周

北漢

晉祠新松記

元和元年

令狐楚撰顏顥書見金石錄舊在太原縣

安邑縣新亭記

元和元年閏六月

劉思老撰李銑書見金石錄今不知

所在

河東節度使高秀巖碑

元和二年十二月

馮令問撰今在稷山縣東北十五里

稷山縣志唐渤海郡王高秀巖墓在廉城村馮令問記
乾隆元年知縣阮汝昭查修立碑

謹案秀巖爲安祿山將守太同祿山反謀以兵三萬
出振武下朔方者也至德二年又與史思明合兵十
萬攻李光弼於太原祿山死始以河東節度納順朝
廷以爲雲中太守官其諸子見唐書安史各傳碑云
幽州節度慕其嘉聲表奏薊州刺史續除河東節度
留後所言幽州節度卽祿山也其續除留後在祿山
反時文隱其事而下直接云乾元二年授戶部尙書
兼御史大夫河東節度渤海郡王並雲中太守不書
以事在至德中故皆諱之也

晉衛伯玉遺愛碑

元和六年 舊在安邑縣

集古錄目唐立晉衛伯玉遺愛碑伯玉裔孫唐陝州觀察使次山撰河東節度使張宏靖書伯玉河東安邑人晉惠帝初以太保錄尚書事爲楚王瑋所殺

陽公舊隱碣

元和六年 舊在夏縣

集古錄右陽公舊隱碣胡證撰黎煇書李靈省篆額唐世篆法自李陽冰後寂然未有顯於當世而能自立家者靈省所書陽公碣筆畫甚佳既不顯聞於時亦不見於他處以余家所藏之博而見於錄者惟此雖非絕筆亦可惜哉嗚呼士有負其能不爲世所知者可勝道哉

集古錄目陽公舊隱碣刑部郎中胡證撰夏縣令蔡煇書

縣人李靈省篆額陽公佚其名證其門人也無所立年月在夏縣

志略煒按此碣集古錄跋尾作元和中訪碑錄作元和六年立必有依據唐諫議大夫陽城故居在縣南十五里中條山內地名柳谷昌黎文集可考叔弼謂陽公佚其名竊意當卽城也惜無由見碣文以證其是否

侍中尙書右僕射贈司空裴耀卿碑

元和七年十一月 今在稷山縣仁義村

金石萃編按此碑撰者許孟容結銜云正儀大夫行尙書兵部侍郎上柱國高陽縣開國子賜金魚袋舊唐書傳孟容字公範京兆長安人元和初遷刑部侍郎尙書右丞四年拜京兆尹賜紫改兵部侍郎

新書無此官

終尙書左丞東都

留守其封高陽子兩傳皆無也書者歸登舊傳云登字冲
之蘇州吳郡人順宗初以東朝舊恩超拜給事中賜金紫
遷工部侍郎官終工部尚書碑結銜工部侍郎與傳同而
不書賜金紫至長洲縣開國男則傳所無也傳又稱登有
文學工草隸而不言其能篆書此碑登書並篆額又集古
錄載百巖大師懷暉碑亦登篆額是登兼工篆也碑稱燿
卿字子渙新傳云字煥之與碑異傳又云絳州稷山人碑
云河東聞喜人地理志聞喜與稷山同屬絳州州屬河東
道唐時河東道所屬有河東郡碑稱河東是道非郡也此
語太拘所云河東聞喜乃舉古籍解言之耳
漢聞喜屬河東郡稷山本聞喜地隋始分置碑雖稱其貫
曰聞喜而其後歸葬仍在稷山故稷山聞喜碑傳互見也
碑敘燿卿先世□□□景大王父正周隋書皆無傳王父

存考守真新書裴守真傳云後魏冀州刺史叔業六世孫

碑不

敘及父存大業中爲淮安

舊傳作淮南

司戶參軍郡人楊琳田

瓚等亂無敢害護送還鄉貞觀中官至鄧令碑不載隋官

傳不備書唐官皆互有詳略舊傳又載守真舉進士歷八

科

新傳作六科

累轉乾封郡屬

新傳作乾封尉與碑合

尋授太常博士天

授中爲司府丞出爲汴州司錄

新傳作司馬

累轉成州刺史徙

甯州卒贈戶部尚書

舊傳無贈官

碑惟詳正學士夏官員外爲

兩傳所無餘碑傳皆合碑云公卽尚書府君第三子也舊

書守真傳云子子餘次弟巨卿耀卿是耀卿爲第三子與

碑合新書耀卿傳云守真次子與碑異也宰相世系表載

叔業北齊爲南兖州刺史初歸北城南來吳裴後魏爲豫

州刺史叔業第三子簡之簡之之孫景富平令

與碑同

景子

正隋散騎常侍

碑不載

正子存字歸厚

碑無傳

南鄭鄧令存次

子守真字方忠

兩傳無

邠甯二州刺史

與碑傳之作成甯者異

守真長

子子餘次巨卿次耀卿是耀卿亦作第三子與碑合碑載

耀卿歷官多與兩傳合惟碑稱書判入等補麟臺正字傳

作秘書正字爲不同又碑於長安縣令之前先除左庶子

領崇文館事右僕射之下寫貌圖於凌煙閣兩傳皆無而

傳於拜秘書正字之後補桐王府典籤冀州刺史後歷宣

冀州刺史開元二十年副信王禕討契丹二十四年累封

趙城縣侯今碑皆略之或在泐文中不得見也又開元二

十三年破奚契丹後耀卿與李林甫同奏請刊石勒誦此

碑亦未敘及又碑云轉運都使尋遷侍中傳則云轉運使

無都字又碑敘鼎新漕運以廣儲廩下文多泐據新傳云

山陰縣志卷之十三
金石記五
值河陰集津三門倉引天下租繇孟津沂河而西三年積
七百萬石省運費三十萬緡可據以補碑之泐至碑所云
逋負之徒征徭之毗追琢貞珉存於道左是當時立碑頌
德政也而今不傳碑云有子八人遂泛淑綜延餘人皆泐
下文又有臯官給事中兩傳惟載綜及綜子佶世系表則
有六人曰遂泛汝綜舉延與碑互異耀卿以天寶三載十
月葬此碑立於元和七年十一月距其葬又六十九年以
臆度之是其孫佶官國子祭酒工部尙書時所立立碑之
明年佶已卒矣耀卿有孫七人曰旣收彪佶琬武堪今惟
佶武見於碑餘亦泐

志略煒案裴氏爲晉唐以來名族聞喜其故居也縣志稱
縣去祖莊裴柏村十里曰鳳凰原北至紫金山南至涑水

東至牛塢西至雞鳴山其中倉底永青趙村柳泉坡底居
台愛里諸村裴氏祖塋多在共大家一百五十有奇碑記
六十餘座享亭在永青守墳寺二在愛里裴家寺云云竊
意其光塋內碑碣如是之多不應見於著錄者僅鏡民行
儉光庭數碑如耀卿父子尙別在稷山不計也由前人作
志不記金石又無好事者爲拓本以傳久遂湮沒耳然古
物之出曾有其時安知不再顯於今日也

石壁寺甘露義壇碑

元和六年 今在交城縣石壁山永甯寺

志略李逢吉撰貞元元和間甘露屢降河東節度觀察使
禮部尙書北都留守太原尹李說樹碑按碑云我唐之壇
角於三都西都曰靈威壇東都曰會善壇北都曰甘露壇

又云自貞元癸酉暨丁丑歲而能事畢又云自四月八日至廿四日而法會罷癸酉爲貞元九年至十三年爲丁丑金石文字記作元和八年當再考之

上柱國申屠輝光墓志銘

元和十一年十一月 今在潞城縣北二十里合室村

謹案石於光緒中出土會刊縣志縣人採入志中而鈔寫脫訛不可句讀文爲陽城景逸撰考申屠氏本申侯之後居安定屠原因以爲氏或云申屠楚之官號而文敘世系以爲楚大夫申繻之後前時列土封望謂曰金城人以魯爲楚以著望爲封望已不可解會祖伏興吏部常選祖後進朝散大夫而不及父次子軫文林郎試左武衛兵曹參軍上柱國官階僅九

品而勳級乃正二品三子道義名籍上黨縣龍興觀
道士四子法宣又爲潞城勝緣寺僧亦皆奇也輝光
以貞元志訛爲至元六年卒至元和十一年與夫人張氏
葬合室西北一里文不詳所歷官而標題爲上柱國
殆取其子勳級加之父歟

安定郡王李光進碑

元和十三年 令狐楚撰子季元書今在榆次縣趙村
金石文字記光進與弟光顏並爲唐名將憲宗平淮西光
顏功最高唐書二人並有傳光進碑令狐楚所撰光顏碑
李程所撰皆名臣也然歐趙二錄皆無此二碑歐錄所載
李光進碑楊炎撰韓秀實書者乃李光弼之弟非光顏兄
也趙錄有贈太保李良臣碑則光進之父官止雞田州刺

史初無功績以光顏故贈太保與二子同葬一地乃趙氏錄其一而遺其二殊不可解余友朱錫鬯過榆次搨得此碑以副本遺余故得而錄之其良臣光顏碑則已見記中矣

金石錄補按碑云安定郡王諱光進字耀卿年五十七其先阿跌氏出於南單于十二姓貞觀初祖賀之內屬父良臣爲雞田州刺史光進以隴西郡公說榮陽郡公儋大司空嚴公授大司徒范公希朝薦云云新唐書有名無字如封安定郡王及其祖父皆在所遺表薦者惟王承宗與范希朝而已檢校工部尚書與碑題刑部尚書異皆當以碑爲正至兼御史爲代州刺史及光顏先娶母死光顏婦籍貴財納管鑰光進位而反之碑亦遺焉子季元燧元毅元

綬元吉元夫人史氏以乙未六月薨越十一年葬而無紀
元傳云元和四年表薦爲都將俄授振武節度遷鹽武當
薨在元和十年葬在寶曆元年也

潛研堂金石文跋尾光進以元和十年六月卒於鎮十一
年二月還葬太原府東四十里孝敬原十三年春弟光顏
於淮西入朝請於天子得立碑於墓朱錫鬯云光顏請於
朝葬其兄者蓋考之未詳耳碑無建立年月攷宰相表令
狐楚以元和十四年七月守中書侍郎同中書門下平章
事十五年閏月爲門下侍郎七月罷以楚署銜驗之當在
十五年無疑潘次耕題作元和十一年亦誤也傳云年六
十五而碑作年五十七當以碑爲正光進字耀卿封安定
郡王光顏封武成郡開國公皆傳所未載其稱李自良爲

朗甯王亦未見於史也文云蔡邕撰有道之碑自知無愧
范文觀武子之墓可以與歸范文疑趙文之誤又云贈工
部尚書李奉國弼公之伯姊奉國者本傳所云舍利葛旃
也

金石萃編按此碑無建立歲月據撰文者令狐楚結銜爲
門下侍郎中書門下平章事證以唐書宰相表是此碑之
立在元和十五年閏正月辛亥入相以後七月丁卯罷相
以前之事矣然據碑文是元和十三年春光進弟元顏入
朝疏請立碑不知何以遲至兩年之後始撰文而立之也
碑云越十一年二月己酉葬乃是元和十一年非謂卒後
十一年金石錄補謂葬於寶曆元年者誤也兩唐書光進
傳敘事甚簡不如此碑之詳然碑有與傳不同者光進之

卒新傳不詳歲月舊傳則云元和十年七月碑云歲在乙未季夏六月寢疾於理所旬有八日口口厥命若是卒於七月碑當有七月字不得僅云旬有八日此旬有八日卽在季夏一月之內則是卒於六月碑云享年五十七兩傳皆云六十五此其尤異者也碑云葬於太原府東四十里孝敬原山西通志陵墓卷太保李良臣墓在榆次縣北十里趙村西李宗閔撰神道碑曰貞元十一年八月葬於太原府城東南孝敬原子光進墓令狐楚撰碑光顏墓李程撰碑亦云葬於太原縣東孝敬原以輿圖證之榆次縣在太原府城東南元和郡縣志云去府城五十六里故孝敬原在榆次北十里與碑言太原府東四十里合也碑云公之先本阿跌氏出於南單于左廂十二姓貞觀初大父賀

之率其屬來歸太宗制受雞田州都督云云元和八年秋
公遷爲秋官改拜靈州賜姓李氏列於宗籍舊唐書傳則
以賜姓在六年爲異而賜姓爲光進事則傳與碑同至通
志氏族略云阿跌氏九姓阿跌部爲雞田州都督唐軍于
都護振武節度使兼御史大夫阿跌光進元和二年賜姓
李名光顏陳許節度使是以賜姓爲二年事旣與碑異而
又似以光顏爲卽光進所改名則更誤矣碑稱其父良臣
曰先父又曰先君母史氏曰先夫人撰文者稱他人之父
母加先字始見於此碑書我庚空竭庾作庚是筆誤旬有
八日有字下多書者字旁用點抹去之其例亦始見此碑
漢故丞相翟方進重建碑表

長慶二年八月 長孫儉撰今在猗氏縣西五里翟村

謹案碑於順治季年經水盪出撰文之長孫倬無攷
文稱方進本汝南上蔡人有子曰宣曰義義爲東郡
守以王莽倖亂攝政扶順討逆師敗被誅其餘子孫
逃難西遷改葬於此故諸孫代爲河東猗氏人墓舊
有碑貞元初懷光兵變折墜草莽其宗長翟瑀等啓
於邑宰李公重建此碑以表年月據此則翟村之名
實起東漢忠義餘裔流澤孔長貞珉昭然歷劫不湮
非徒故老流傳之足信也

贈太保李良臣碑

長慶三年 李宗閔撰楊正書今在榆次縣趙村

金石錄良臣李光顏之父也碑李宗閔撰文詞爾雅可喜
宗閔牛僧孺皆一代奇材而自陷於朋黨惜哉

授堂金石跋李光進傳云其先河曲諸部姓阿跌氏貞觀中內屬今以碑證之良臣王父當唐初受命太宗文皇帝已卽大位遂率其所統南詣靈武請爲內臣於時方在貞觀初而史以爲中非其實也宰相世系表敘雞田列爲內地建置刺史之由案碑良臣王父賀之太宗拜爲銀青光祿大夫雞田州刺史充定塞軍使表宜緣此爲文然後子弟襲職始有因依良臣父延豐襲雞田州刺史以功加開府儀同三司太常卿上柱國贈工部尙書表旣未詳延豐生三子長日光玘爲朔方都將表亦無文而於良臣下卽書光進次光顏是脫其長子不錄蓋於史爲失紀皆宜依碑爲據也永叔作表當本其人之家譜而譜以子孫自敘必不疎漏至此或雞田李氏傳譜已佚永叔但卽舊史所

錄而存之以備李氏宰相之一宜其有未備也歟

金石萃編按此碑無建立歲月歐公集古錄不收此碑趙氏金石錄目作長慶二年據碑撰文者李宗閔結銜云守禮部侍郎舊唐書宗閔傳稱其權知禮部侍郎在長慶三年冬至四年貢舉事畢卽權知兵部侍郎矣碑文前敘李光顏破功自庚子歲起歷敘至鎮許昌斬芥首平汴宋冊功拜司徒兼侍中等事舊書李光顏傳長慶四年敬宗卽位正拜司徒汴州李芥逐其帥叛詔光顏率陳許之師討之俄而誅芥遷太原尹仍於正銜受冊司徒兼侍中然則碑文敘事已及長慶四年則非二年所立明矣惟謂碑立於四年與李宗閔結銜不合則當是宗閔傳有誤也汴州李芥碑書作宋宋卽芥字與个介相通同例尙書秦誓一

介臣大學作一个臣也良臣爲光進之父本姓阿跌氏而碑稱李公是由光進光顏賜姓而追稱之也光進碑已列於前而良臣碑以後刻乃次於後兩碑互勘父子事蹟始詳獨怪元和十三年光顏請立光進碑時何以不連及其父碑至十五年立光進碑時又不並良臣碑同立皆不可曉也

絳守居園池記

長慶三年五月 樊宗師撰舊在絳州

集古錄或云此石宗師自書嗚呼元和之際文章之盛極矣其怪奇至於如此

金石錄昔之爲文者雖務爲新語然未嘗有意於求奇宗師之文乃故爲險怪必使人不可曉此豈作者之體哉

四庫全書提要絳守居園池記注一卷元趙仁舉吳師道
許謙注宗師始末具韓愈所作墓誌中是文乃長慶三年
宗師官絳州刺史卽守居構園池自爲之記文僻澁不可
句讀董道廣川書跋稱嘗至絳州得其舊碑剔刮磨洗見
其後有宗師自釋然僅略注亭榭之名其文仍不盡可解
故好奇者多爲之注據李肇國史補稱唐時有王晟劉忱
二家今並不傳故趙仁舉補爲此注皇慶癸丑吳師道病
其疎漏爲補二十二處正六十處延祐庚申許謙仍以爲
未盡又補正四十一條至順三年師道因謙之本又重加
刊定復爲之跋二十年屢經竄易尙未得爲定藁蓋其字
句皆不師古不可訓詁考證不過據其文義推測鉤貫以
求通一篇之文僅七百七十七字而眾說糾紛終無定論

固其宜也以其相傳既久如古器銘識雖不可音釋而不得
不謂之舊物賞鑒家亦存而不棄耳

謹案紹述原石久佚宋通判孫冲嘗再刻之諸家注
釋之外有州人趙師尹曲沃張子特二注見州志

彌勒菩薩上生變讚

寶曆元年三月 今在鳳臺縣

鳳臺縣志沙門紫羽撰書文用駢體後書寶曆元年姑
洗之月二十日鄉士侯政書文字俱古雅可愛

慧遠法師遺蹟記

寶曆元年四月 今在鳳臺縣東南三十五里藏陰寺後

鳳臺縣志沙門紫羽刻石記稱慧遠爲澤州霍秀里人
俗本燉煌李氏故居尙存與首慧遠同名相距四百餘

年別爲一人周武欲廢寺塔抗辭折服入隋文帝命公
參校經義卒深悼惜之考太和釋紫羽碑以慧爲惠與
此不同其云寶厯元年則敬宗乙巳也

虞鄉令張遵墓誌銘

太和元年十一月 王勣撰今在虞鄉縣

虞鄉縣志墓在縣東五里潛龍岡乾隆三十八年墾出
於虞東屯東莊韓氏屋舍之旁

謹案文稱遵字敬儒范陽人曾祖守瓌朝散大夫將
作大監上柱國賜紫金魚袋祖去奢銀青光祿大夫
京兆尹賜紫金魚袋父勤朝散大夫太子少詹事遵
以門蔭直右武衛授官厯安豐尉靈寶主簿復授此
官秩滿卜居於茲長子論試太常寺奉禮郎檢世系

表姓纂皆無其人撰文之王勣亦不可攷志墓之文率多溢美此文有云公性剛武臨事果決慕宏羊之潛計尙顏高之勇力居必屋涸何患乎飯塵出必遊畋何憂乎陋巷又稱蒞虞三載庭無留事賓朋笑樂日以爲常是直譏爲貪酷不止微辭矣亦墓銘所罕見也

晉大夫師曠廟記

太和二年三月 舊在洪洞縣

謹案廟在縣東南二十里師村文見舊通志失其撰人記云曠字子野師姓河東古羊城人羊當爲楊之

訛文不詳建廟始末蓋已古矣後見拓本文爲遼海軍節度判官趙廣聰

撰居席關大使郭汝明書未署泰和壬戌十月已舊志藝文誤爲唐太和也

薛平增修家廟碑 有陰

太和三年 舊在夏縣

集古錄曰薛平家廟碑左散騎常侍集賢院學士馮宿撰
給事中裴璘書河東節度使薛平增修其家廟以太和三
年立

志略煒按墨池編有河中薛正夏縣修家廟碑而無書撰
人姓名又有碑陰子孫題名疑卽此碑而誤以平爲正也
書叢譜引天下金石志亦作正

福田寺置粥院碑

太和六年 今在開喜縣

聞喜志補石碑在東關福田寺裴少慶書裴自邑人而
唐表及其世牒皆不載邑舊志固無從立傳也書得髓

北海染指誠懸綽入能品乃近在外郭未聞種蠟及之者今方自土中掘出物頤晦固有時哉碑字多構別體古人所不拘惟羨藜之美卽羔字味碑語乃代葬字用矣

青蓮寺碑

太和七年 釋道振撰司徒映丹書今在鳳臺縣峽石山鳳臺縣志道振記讀法華經姓名歷敘高僧首北齊曇始奏藏陰寺講涅槃經野雞來聽猿猴獻果之異周有惠遠法師注涅槃經成擲筆昇空唐代宗時神墨禪師貞元時智通法師後有惠惜智峰來此爲太守王公挽留住錫城隍信士各持法華經品第八共立邑人司徒映丹書考太和七年爲文宗癸丑貞元則武宗改元

德宗

宗興元二年改
貞元云武宗誤

福州團練使薛謩神道碑

開成二年 劉禹錫文舊在臨晉縣北原

謹案唐書無謩傳世系表薛氏有南祖北祖西祖謩
系西祖興下所謂漢上五門薛氏者水經注漢水出
汾陰縣南四十里俗呼之爲漢魁者也碑敘世次曾
祖寶積祖繪父承矩悉與表合特碑書官位甚詳表
太疏略至承矩不著其職謩官止泗州刺史耳據碑
謩娶河東節度李說女而謩得實爲謩長婿碑稱云
薨於元和十年後二十有三年元日開成正夢得內
遷太子賓客再分司東都時所云公以淮南行軍司
馬主行臺留務趙國公文茵及境云云趙公者李吉

甫也又稱公初下世故人丞相李太師誌其墓太師者李逢吉也碑不知亡於何時文見劉賓客集

應聖公祠堂碑

開成二年 舊在趙城縣東四十里

趙城縣志唐中鎮碑正議大夫刑部尚書兼判左丞上

柱國賜紫金魚袋鄭瀚奉勅撰遊擊將軍守左金吾衛

將軍驍騎尉賜紫金魚袋李執方書開成二年正月十

八日勅建今無存

案碑銘見霍州志文有云故能封

以報功瀚曩時官謬紫微郎將命大鹵霍鎮之下魏宮不奪敢饒菲詞以悛王業銘曰云云則建廟錫爵實始明皇天寶碑固當久佚若此碑州縣志並能詳撰書人結銜未必遂湮沒無蹟也

河東節度使司徒兼侍中贈太尉李光顏碑

開成五年八月 李程撰郭虔書今在榆次縣趙村

曝書亭集去榆次縣三十里趙村有穹碑三中央一通仆地折爲二段贈太保李良臣碑也其辭李宗閔撰楊正書立於長慶二年右一通安定郡王李光進碑也其辭令狐楚撰子季元書立於元和平蔡之後左一通太尉李光顏碑也其辭李程撰郭虔書立於開成五年良臣本河曲部落稽阿跌之族襲雞田州刺史隸朔方軍其稱太保者以子貴贈官光進光顏皆以功蓋天下時人以大小大夫別之兄弟孝睦載於舊史而碑稱光顏平吳元濟師旋請於朝葬其兄則史傳未及又碑書光進爲安定郡王史沒其文吾意碑辭實不誣矣

金石錄補序云相國晉公之文書公盛績永誌元堂今之甄述得以略焉光顏之傳視其兄加詳功烈偉矣碑之所

述其大凡耳雖有裴晉公之文不應若是之略但傳云年六十六而碑則六十五

潛研堂金石跋尾李程文甚簡略蓋有裴度之誌詳之則碑文可以從簡古人作文不相蹈襲雖他人之文亦必回避如此據碑文與本傳光顏未嘗帥橫海軍而宰相表云長慶四年橫海節度使李光顏守司徒亦誤

金石萃編按此碑撰者李程書者郭虔兩唐書無郭虔傳李程全唐詩有其人小傳稱其在翰苑日過八瓊乃至時號八瓊學士此碑李程結銜以舊唐書傳考之封彭城郡公在敬宗卽位之初其官河東節度檢校吏部尙書同中書門下平章事兼太原尹北都留守俱寶曆二年事唐書宰相表在寶曆二年九月惟吏部表傳作兵部爲不同光

顏以寶歷二年九月三日薨

舊唐書敬宗紀作九月戊寅薨是月丁丑朔戊寅是二日

明年二月二日葬則李程之撰文正在薨後葬前而碑立於開成五年是葬後十五年也榆次縣李氏有三碑光顏父貞臣兄光進二碑已見前舊唐書地理志范陽節度使臨制契丹統經略威武清夷靜塞恆陽北平高陽唐興橫海等九軍橫海軍在滄州城是橫海乃九軍之一而總隸於范陽節度不云別置節度也方鎮表則云貞元三年置橫海軍節度領滄景二州治滄州光顏傳載長慶二年討王庭湊命兼深州行營諸軍節度使又以滄景德棣等州俾之兼管是滄州在兼管之內其本職是深州行營也或當時深州行營駐兵滄州兼領橫海是以宰相表有光顏橫海軍節度使守司徒語而志傳及碑俱略之耳

張宏靖祭唐叔虞文

會昌四年三月 李德裕撰正書無姓名見金石錄舊在太原縣

張宏靖山亭懷古詩碣

無年月舊在太原縣見縣志

雲峰寺碑

大中三年 在霍州漸壁村見舊通志

遠公廟碑銘

大中五年 今在鳳臺縣霍秀里

鳳臺縣志碑前列施主姓名次爲銘詞文稱唐大中五年創立蓋宣宗辛亥也中敘遠公事蹟甚悉其稱後周武帝二年於齊承光二年召沙門至西京欲廢其教遠公折服

之教得不廢唐寶曆年碑金大定碑並載此考周武帝罷
汰僧道在建德三年此時與齊通好寺在齊之建州周何
能越境禁斷至六年正月齊主傳位於子恆改年承光奔
青州尋爲周所滅亦並無二年之說或碑有訛也

河中絳隰節度使司徒贈太傅薛平碑

大中七年 李宗閔撰柳公權書舊在萬泉縣薛村

金石錄右唐薛平碑據唐史列傳平爲平盧軍節度使就
遷檢校右僕射封魏國公寶曆初入朝拜檢校司空爲河
中節度使進檢校司徒更封號以碑考之自平盧拜僕射
進封韓國公敬宗卽位拜檢校司空寶曆元年朝京師
換左僕射兼戶部尙書踰月復爲檢校司空節度河中文
宗卽位就加檢校司徒蓋未嘗封於魏而敬宗時入朝所

拜官碑亦不載皆其闕誤也碑言平罷滑臺爲金吾嘗見
二神人自天執節降庭中呼曰薛平還汝舊節公俯伏拜
受及再爲滑臺以爲當之矣後爲平盧乃驗焉其事甚怪
而唐史無之豈非妄歟

謹案萬泉縣志唐河中絳隰節度薛公墓碑在縣北
薛村不著其名趙錄平碑亦不詳所在萬泉本汾
陰龍門諸縣置於薛通城者其北薛村本龍門地爲
平曾祖仁貴舊籍其家廟在夏縣以仁貴三世墓所
在也夏縣當時屬陝不在河中管內龍門正所領之
絳州屬也豈平以樹節故鄉爲榮別葬於此歟

鹽宗祠記

大中十年 錢義方撰盛濤八分書舊在安邑縣

集古錄近時有尙書郎張席自言家屬解州爲余言安邑解縣兩池鹽事云夏日鹽南風來池面紫色須臾凝結如雪土人謂之漫生鹽而兩池歲役畦夫數百種鹽公私耗故而州縣吏緣以爲姦利聚漫生鹽不取誣其苦不可食席博學能言漢唐事尤詳爲余復言前世鹽皆自生開元中姜師度爲河中尹而鹽池涸始置鹽屯故唐格自開元後遂有畦夫營種之課席上書論漫生鹽之利官遂罷畦夫而公私皆以爲然而議者或害其事乃云漫生鹽味苦不可食或云暫結復消不可蓄聽者方戚其事余因讀義方所記乃云若陰陽調和鬼神驅遣造不勞人而擅其利與夫鑿泉煮海不相爲謀由是知唐世鹽非營種決爲可信義方大歷時爲權鹽使余家集錄古文不獨爲載記正

訛謬亦可爲朝廷決疑義也

案大歷字誤當依錄目作大中

集古錄目太子右庶子支度安邑解縣兩池榷鹽使錢義方撰試作武衛兵曹參軍盛濤八分書神祠故名鹽宗其後又有靈慶祠而主吏不復親往祠宇墮廢義方重營葺之此記以大中十年立

寰宇記鹽宗廟在安邑縣東南十里夙沙氏虞海爲鹽宗尊之也

高祖寓居石表

大中十一年 今在芮城縣

集古目錄唐寓居石表記陝府芮城尉馮禮與書隋大業中高祖寓居芮城之至德鄉大中三年縣令高元暮立此碑在南陽縣

案謂在南陽誤其云大中三年亦未確

芮城縣志龍潛宅在縣西二十五里李叫村西南崖下唐築臺建壇刻石表曰唐高祖神堯皇帝寓居大中十

一年縣令高元藝立後廢

侯真人降生臺記

咸通三年 今在芮城縣西二里紫清觀側

志略真人名道華以唐大中五年化去咸通三年邑令高

元藝築臺刻石記載真人居永樂縣道靜院師事院主周

鏡子帶上留詩悟多異蹟改名爲李內芝及仙去房中

今夜碧空飛慧愧深珍重待丙芝詩師知此術速鍊莫爲

遲三清專心待大羅的有期

令狐楚登白樓賦石刻

咸通三年 舊在蒲州府

集古錄右登白樓賦令狐楚撰白樓在河中至楚子綯爲

河中節度使乃刻於石綯父子爲唐顯人仍世宰相而楚

尤以文章見稱世傳綯爲文喜以語簡爲工常飯僧僧判

齋納於佛前跪鉢誦聽而僧倡言曰令狐綯設齋佛知鑿以此譏其好簡楚之此賦文無他意而至千有六百餘言何其繁也其父子之性相反如此信乎堯朱之善惡異也青蓮寺山田石碣記

咸通八年 張靖境書今在鳳臺縣

鳳臺縣志無撰人姓氏記稱澤州東南三十里勅號青蓮寺北齊禪師口奏藏陰所管三莊田地二十餘頃輸稅若干至太和九年僧惠情說郡主王中丞減稅若干畝會昌三年沙汰若干畝又咸通八年孟員外奏聞請勅賜青蓮爲額割地若干畝咸通八年爲懿宗丁亥所謂郡守王中丞孟員外府州志俱失載

慶國寺墓塔銘

咸通中 今在翼城縣

志略寺在城西門外高阜唐咸通中建宋太宗時改爲太平興國寺後有咸通間墓塔碑志不著其名殆亦僧徒寂後之塔銘耳

武鄉令李布公墓誌

光啟元年 舊在武鄉縣

武鄉縣志唐縣令李布公墓康熙五十年墓毀石出乃自東門外改葬於榆嶺誌略云公諱布公家承賁蔭棉州參軍任陝西夏縣尉遷武鄉令以中和五年三月十二疾終公署將柩先塋阻於兵革以光啟二年二月十日卜葬於武鄉之九原慮陵谷變遷刻石以紀云云

謹案寰宇記武鄉縣後魏太和十五年自古涅城移

郡治於武鄉郡之南亭川

語有誤辨詳府州應縣考

縣志謂卽今

治也然記謂武鄉水在縣西六十步今水在縣西五里殊未爲合蓋以此志則今之東門在唐末尙名九原故城當在今治西三四里其遷徙之蹟今不可考大約在北宋或金源時

文中子碑

皮日休撰舊在沁州

舊通志文中子祠碑在紫金山唐皮日休龔美氏撰又文中子讀書處在銅鞮山

謹案文中子父隆爲銅川令銅川隋分秀容縣置今爲崞縣地沁州本古銅鞮銅鞮水俗亦名銅川然未嘗以名縣也後人誤以銅川府君會官沁州於是州

遂有文中子遺蹟矣皮襲美碑自云想像封隧所在
爲銘則是墓碑亦未果刻石也方志競相援引殊爲
失實惟元遺山送弋唐佐董彥實南歸詩云河汾積
經名自重附會人嫌逼周孔史臣補傳久已出浮議
至今猶洵洵薛收文志誰所傳實甚竹書開汲冢沁
州破後石故在爲礎爲砥吾亦恐又云摩挲石刻喜
不勝忘卻崎嶇在岡隴則沁州實有唐人所刊碑矣
特未必卽襲美文也

洛州判官任茂宏墓誌

大順二年 今在汾陽縣牧莊龍天祠

汾陽縣志石於道光三十年耕者得於城南牧莊河灘
中撰書人及誌前數行剝蝕難辨文略云晉祖嚴鄜州

鄜城令祖貞古郴州臨武令考清宗正寺光陵令公諱
茂宏字廣遠懿宗皇帝之五年威遠軍裨將授朝議郎
行右武衛朔府兵曹充表奏判官靈寶尉署觀察衙推
中和初調北京榆次尉薦授介休令文德改元假西河
宰再奏充洛州判官大順二年卒於汾州私第春秋五
十有五其年十一月權厝於州西南八里西河縣文信
鄉白草溝之原誌未有公累代松楸遠寓秦郊語知茂
宏爲陝右人又有公夫人高氏輦之族姊熟窺懿範願
紀壯猷語知誌爲高輦作薛居正舊五代史後唐明宗
有秦王府諮議參軍高輦又見於歐史及五代史補諸
書或卽其人歟

龍泉禪院碑

乾甯元年 今在陽城縣東三十里龍泉寺

陽城縣志碑尙完好澤州司法參軍徐綸撰

崇舊通志龍泉寺一

名海會寺唐乾甯元年建初名郭峪院似卽據此碑又云勤信類增修後郡牧李抱真疏奏勅賜額曰龍泉禪院抱真銅澤路在貞元時何得乾甯初方建寺耶所

撰年號姓名必有一誤又志略云後周顯德二年徐綸撰

樂氏二女父母墓碑

乾甯元年 張瑜撰今在壺關縣南九十里櫻桃掌

壺關縣志碑後書鄉貢進士口瑜撰口武都虞侯馮口

書一泐其姓一泐其名又碑銘之末有感應詩五十六

字聖女嘉祥推感應葬儀傷慟九般情林中愁聽黃鸝

嚀月下惟聞白鹿鳴慧日流光重抱戴瑞雲頻繞五花

成莫言此地無松柏刊石留將記姓名

謹案金趙安時重修真澤二仙祠記云天德四年因任太常職事於寺扁檢討舊書偶見仙壘碑乃唐乾甯年進士張瑜所撰其略云羅神之曲紅裳繡履係是本身方信昔年張權祖母所見服純紅衣者乃真容也

安時碑記

二女得道始末中有云先是百年前

見二女服純紅衣鳳冠儼然至洞南弗見夜見夢日汝前所親見者乃我姊妹也汝家立廟於化現處令

汝子孫著

富云云又云歲儉求之卽豐時旱禱之卽雨違之

者災禍交至順之者恩福俱興益知神之靈應福善禍淫昭然有驗矣其末又載旣仙之後葬父母之五瑞惜乎仙傳道史遺逸而不載本廟古碑又多散亡其本略見於唐之壘碑故並書於後據所云太常仙壘碑卽是碑也今巍然尙存其地距陵川最近兩縣

人奉二女至虔何以安時僅見墨本而云廟中古碑
散亡壹闕舊志亦僅引宋大觀碑言真人父母墓碣
唐乾甯甲寅所作而已豈碑久湮至近年始復出耶
慧峰和尚塔記

乾甯二年 今在鳳臺縣硤石山

鳳臺縣志記稱唐故先師和尚汝州襄城人俗姓賀蘭
氏法號慧峰於中和壬申歲八月二十八日僊化去乾
甯乙卯建造靈塔十月功畢故記中書心經後書僧徒
宗派字甚蒼古

左龍武軍統軍檢校司徒贈太保李國昌碑

舊在代州西八里柏林寺側

代州刺史李克讓碑

同前

曝書亭集代州柏林寺東晉王李克用墓斷碑二其一曰唐故左龍武軍統軍檢校司徒贈太保隴西李公神道之碑文曰公諱國昌字德興世爲隴西沙陀人偉姿容善騎射蓋克用之父朱邪赤心所謂赤馬將軍火生頭者也其一曰唐故使持節代州諸軍事代州刺史李公神道之碑文曰公卽太保之次子也其名克字僅存餘可識者有公前躍馬彎弓及徐方等數字按史克用弟四人次曰克讓爲振武軍校從討王仙芝以功拜金吾將軍宿衛京師親仁里第自克用稱兵雲中殺守將段文楚詔捕克讓克讓與僕從從數十騎彎弧躍馬突圍出奔雁門與碑文合則爲克讓無疑但史載克讓守潼關與黃巢兵戰敗匿南山

佛寺中爲寺僧所殺不言其爲代州刺史又得歸葬於代
皆不可曉者土人相傳王墓上舊有碑十三今十一已亡
其二存者又散埋土中蓋金石之文自歐陽永叔趙明誠
後世無篤好之者宜其漫漶不可辨識如是也當永叔時
去五代時甚近沙陀世次已不得詳其爲唐家人傳謂太
祖四弟皆不知其父母名號至國昌字德興紀亦遺之是
十三碑永叔亦未之見更六百年而余乃得睹其二非幸
歟惜乎十一碑不及見也同里曹先生博采金石有歐陽
趙氏之好出二碑於土摹之搨本俾余審定其字若干遂
書其後歸之

河中節度使王重榮德政碑

舊在蒲州府

集古錄王重榮德政碑歸仁澤撰唐彥謙書重榮當唐之末再逐其帥遂據河中雖破黃巢平朱玫之叛有功於一時而阻兵召亂爲唐患者屢矣碑文辭非工而事實無可採所以錄者俾世知求名莫如自修善譽不能掩惡也夫重榮立碑豈不欲垂美於千載而其惡終於後世者毀譽善惡不可誣故也彥謙以詩知名而詩鄙俚字畫不甚工皆非余所取也

龍泉禪院碑

舊在陽城縣劉村

陽城縣志唐明宗爲太尉時駐軍高平僧洪密預識之爲建禪院樓齋堂一百餘間司空圖撰碑

唐建郭林宗碑

行書無姓名見金石錄舊在汾州府

謹案宋謝景初魏文侯墓碑云汾州圓牒東漢郭林宗墓在介休縣東二里蔡邕作林宗碑在墓之側余於州城東大中佛寺北廡得林宗碑備刻之其一蔡邕之文其一記林宗後裔織悉不刻立碑年月推本似隋唐間不知何時移置州城也予今訪求而林宗墓亡之矣據此則林宗墓宋人已不知所在蔡碑既爲摹刻唐碑亦經移置但不知德父所見卽汾州之大中佛寺本否 以下諸碑並闕年月其時代無從考核彙錄之天佑以前而以天佑二碑附焉

汾州創置城隍祠記

李道業撰見墨池編

然燈經

舊在汾州衙土地廟中見墨池編

三元黃錄壇頌碑

楊江書見墨池編舊在平遙縣

隆道觀殘碑

今在太谷縣

太谷縣志唐白將軍建隆道觀碑在縣南十二里鳳凰山下晉陽記隆道觀大唐時當里佐命白將軍所修香火之地殘碑剝落不可讀

淨信寺殘碑

今在太谷縣

太谷縣志唐淨信寺碑在縣東陽邑村碑四面皆有字

率漫漶不可讀碑面之稍可辨識者三百三十餘字

謹案碑文有云姑藏李銳爲丞隴西李擢爲主

隴西李擢爲主字

口陽張璿之河南獨孤隗隴西牛庭玉長安杜鄰爲尉又云共潔冰臺同澄清渭卽此功德圓滿賴吾宰君蓋鄉社建寺頌其長官之辭也文中謂陽邑古城陽處父望在北平食邑此城因以字之從卩關西孔子楊震之口望在華陰故以字之從木焉亦不待辨者謂陽與楊不同望可也陽處父望在北平春秋時安得有北平之名乎

姑射山南古洞碑

今在臨汾縣

志略明張方臬二仙洞記洞旁有碑光可以鑑按之唐物

也文不著碑名並年月書撰人究不知爲何碑也姑射山
人迹罕到此碑當尙存耳

案即宋熙寧九年洪崖
子得道碑詳見補遺

祭禹廟祈雨文

舊在河津縣見金石略

周太師太公廟碑

舊在芮城縣榮呂村南坡下見縣志

青翠菴碑

舊在五臺縣臺山上

清涼山志唐僧支法念棲菴南大松下定中見僧說苦空
既寢聞秋聲瑟瑟不勝其悲因呼爲苦空菴古碑尙存

上方院銘記

今在鳳臺縣

鳳臺縣志上方院銘記無年月及撰人姓名文四六歷敘不空三藏譯真經頒行到寺將佛頂尊勝陀羅尼經摹臨上石之由考唐人百家佛陀波利儀鳳年取經至西京與杜顓等譯垂拱元年昭三藏法師永昌元年大愛敬寺見澄法師俱取譯經校勘相符奉詔頒行其爲唐碑無疑

巡守碑

舊在絳州見金石略

朝散大夫王公德政碑

舊在絳州見金石略

山南西道節度使掌書記右補闕裴公碑

舊在絳州見金石略

萬年令裴君德政碑

舊在絳州見金石略

志略佩文齋書畫譜所採金石略絳州諸碑不具年月亦

無書撰人姓氏

秦鄭氏例止書碑目其云在某州亦統州之屬縣言最多外譌惟此碑題

萬年縣在唐屬京兆卽今陝西之咸甯縣也旣頌德政不應在晉考萬春縣唐屬秦州爲今河津地後州廢改隸絳州此碑萬年或萬春之訛耳

澤州晉城令盧俊碑

舊在絳州見金石略

右廂兵馬使母府君碑

舊在絳州見金石略

薛氏先宗支碑

舊在絳州見金石略

龍門令王公善德政碑

舊在河津縣見金石略

七佛銘

舊在蒲州府見金石略

長子令崔元靖碑

舊在長子縣

志略崔府君碑書畫譜引天下金石志不詳撰書年月據宋管蒙記稱崔令攝虎碑在縣東北疑卽是碑也

代州都督魏公紀功碑

今在崞縣唐林村

謹案唐林縣本名武延則天證聖元年分崞五臺二

縣於忻代二州界置者神龍後改名崞縣志代州都
督魏公紀功之頌故老云碑額是鎮守唐林等處魏

公神道碑

案碑額與碑前額題例同唐林等處字亦不似唐人款

許州刺史王得碑

今在虞鄉縣東十五里石衛村碑多剝落見縣志

郝忠墓碑

今在榆次縣東南十里西塢村碑文剝落見縣志

吳武烈墓碑

今在永甯州東三十里石村見州志

雲州防禦使段文楚墓碑

今在大同府城東八里東塘山

大同府志碑已剝落舊志以爲段文昌按文昌志元三

世孫卒於西川節度其先墓在荊州具見唐書本傳未
聞其葬雲州也考段秀實之孫文楚咸通末爲雲州防
禦使李克用引兵攻之死於關雞臺下唐書本傳沙陀
傳及五代史皆合蓋其時國昌構禍方亟文楚倉卒遇
害不得歸葬汧陽固其宜耳昌楚音轉字訛舊志屢誣
襄謬若此之類當亟爲更正

霓裳羽衣曲

黃幡綽書舊在河中府見金石略

譚案唐詩記事蒲州逍遙樓楣上有唐人橫書類梵
字相傳是霓裳譜字訓不通莫知是非據此則墨書
非石刻也而鄭氏與唐碑同著錄或別有本

處士馮元基誌銘

今在長治縣司馬村

長治縣志馮處士墓誌文略云君諱元字裕甫上黨人也卽馮亭之後裔曾祖龍齊任魏州長史祖範隋任夏州博士父裴潛名不仕處士卒年五十有七嗣子加輝卜葬於城西南司馬村西北平原餘文皆駢儷不書卒年葬期以祖範仕隋推之當是開寶時人

昭武校尉上柱國姜緒墓誌

今在武鄉縣西故城東岩底

武鄉縣志乾隆間墓毀得誌石移上原掩葬誌云大唐故昭武校尉上柱國天水郡唐平侯姜君墓誌君諱緒字保本天水郡人祖闕梁任嵐州刺史寬猛闕神威恩飭性贊六條於熊軾宣七德於龍輪父政授蘇州司馬

夙列英藩旋疑疾展惟公策若轉規謀如泉湧旋軍返卒立績封班便授公上柱國以彰忠烈堂謂風條易動逝水難停春秋六十有一遘疾終於私第

案此下當有葬之時地志

不及或石泐也藉以武功起家文不著其立功之由天水則姜氏郡望也

延州司馬李師行墓誌

今在武鄉縣

武鄉縣志墓在縣東五十里博壁村村南觀音堂內現存墓誌石一塊

高夫人墓誌

今在汾陽縣牧莊

汾陽續志石得之牧莊河灘中尙完好可讀署曰代州刺史任分尊夫人高氏墓誌銘撰文者列銜爲口義軍

節度副使朝散大夫檢校右散騎常侍上柱國賜紫金魚袋姚崇休

安定梁君墓誌

今在壽陽縣

壽陽縣志道光十二年三月壽陽牧者掘土得唐安定梁君墓志并序石刻完好詞雅體潔其地名有飴露鄉段延村山名有巨山今其地皆不可考

晉州刺史李公墓誌

今在平陽府

志略道光丙午三月平陽東關新寺濬池得之石失一角銘闕十八字餘俱完好後有知府長白延志跋曾於友人處見之

案本李公名友金隴西人以太子詹事兼晉州刺史大曆三年卒葬州城東偏

謹案梁君李公二誌皆近數十年內所出者而各縣
新志皆不著其名字然其原石似尙未佚也姑類次
之以俟訪拓

神福山寺靈蹟記

天祐四年 王居仁撰王宗格書今在壽陽縣方山

舊通志方山寺在方山一名神福山有上寺下寺爲唐
李長者通元建長者將著論華嚴掛經囊於虎背曰可
與吾擇一棲止處虎望神福山原直上二十餘里止土

龕後化龕中

案壽陽新志李長者遺蹟有宋張商英龕
宗勝二碑不詳此碑僅見於秦東來唐碑

詩及長者傳注或原石佚也
而志採其文又甚多俟考

白雉山白雉碑

天佑十年 王緘撰舊在平定州

平定州志白雞山在州東北二十里唐李存勳獲白雉
晉王李克用以爲瑞表進於朝故名有古碑存焉

謹案唐亡於天佑四年晉承用其號碑立於十年爲
莊宗討劉守光過廣陽時事時克用薨已五年矣文
云昔歲金橋之戰勢掩昆陽謂五年解潞州圍破梁
師於夾寨也近年泚水之征威符澠上謂七年救趙
王鎔敗梁軍於柏鄉也又云于時躬禔千乘途邁六
辰行方結於魚麗路復經於龍野則正親征幽州將
出井陘也其下卽云睨蒼翠之側於翳蒼之中覩靈
雉而低翔當神駢之逸足又云嗣王祝之日旣瑞世
瑞時可勿驚勿畏乃虛之以雕籠擁之以襟袂則獲
雉卽在斯行並非追述往事而州志乃謂晉王克用

以爲瑞表進於朝何也碑中稱嗣王嗣晉王猶循唐昭宗舊封蓋未滅梁之前守臣節惟謹今以此碑附之唐末從其實也

右唐碑碣起元和至天佑

五代

後唐

檢校太傅都招討使贈太尉李存進碑

同光二年十一月 呂夢奇撰梁邕書今在太原縣鄭村

謹案碑文見舊志止缺銘詞十五句今石裂爲四失

去三百餘字撰書人結銜呂夢奇爲前幽州節度判

官朝散大夫檢校尙

字缺五

兼御史中丞柱國賜紫金

魚袋梁邕可辨者祇曹參軍兼太子校書數字存進

歷事李氏三世文敘所歷官較新舊二史十倍爲詳如歷刺汾石沁慈四州終於天雄軍都指揮使特進檢校太傅史只云歷慈沁二州刺史及振武軍節度鎮州招討使餘皆從略其家世史云振武人本姓孫名重進太祖破朔州得之賜以姓名養爲子碑則云諱存進字光嗣本姓孫氏樂安人也武子之後歷世守職邊土因以家焉曾祖巖振武節度都押衙檢校右散騎常侍兼御史大夫祖勤勝州刺史檢校刑部尙書父佺振武節度都押衙左散騎常侍兼御史大夫是家於振武因從宦祖父非其本籍又碑稱獻祖文皇帝龍潛朔野豹隱雲中肘腋之間瓜牙是任則嘗建事國昌於代北非始從克用於朔州至碑不言

其本名史不著其字則互有詳略也碑稱存進七子
漢韶漢威並河東節度押衙檢校尚書漢殷漢郁並
兵馬使檢校散騎常侍兼御史大夫漢筠單于安北
都護府司馬其幼者爲祿兒歡兒僅漢韶一人明宗
時復本姓歷永平興元武信節度使見於歐史而已
千峰禪院賜勅碑

天成元年 今在陽城縣北四十里劉村靈泉寺

曝書亭集澤州盤亭山千峰禪院後唐明宗賜僧洪密勅
蓋明宗歲位日洪密具表稱賀以此答之文曰退避無所
愧而良多嗚呼五代之季安得聞此長者之言哉歐陽子
謂明宗武君不通文字觀署尾數大字出自親判上有璽
曰書詔新鑄之印

陽城縣志 干峰寺在縣西南八十里盤亭山側相傳後
唐明宗爲將時常至此踐位後勅建寺焉又明宗賜洪
密勅舊有石刻在寺中後寺焚碑石亦燬今所存搨本
乃康熙壬戌歲寺僧摹刻非故物也碑存縣北劉村靈
泉寺寺亦洪密道場俗有明建干峰暗修靈泉之語今
干峰寺洪密塔尙存

乾明寺碑 有陰

天成三年 今在鳳臺縣西北三十里可寒山

鳳臺縣志後唐乾明寺碑陽面書建修始末山西界址
陰書三藏所譯尊勝陀羅尼經并序兵火亂離幸託佛
力保又平謚經始於天佑十四年丁丑鐫記於天成三
年戊子後列施主姓名有錄事衙官等名尙仍唐制所

謂大唐澤州晉城縣建興鄉砂城里漆榭管義興邑皆

唐舊邑也

案舊通志乾明寺天佑十四年建裴鸞云唐未避兵地後照造以報佛恩與碑陸語合似

撰文之人即裴鸞也

彰武軍節度使劉訓碑

舊在永和縣東南五十里見縣志

晉

建雄節度使相里金碑

天福五年十月 李穀撰成知訓書今在汾陽縣小相里金石文字記五代史相里金傳略同惟傳云字奉金而此云字國寶傳云贈太師而此云贈太子太師又封河西郡開國侯而史遺之皆當以此碑爲正也

曝書亭集汾陽縣有大相里小相里相里氏子孫族居焉

按相里氏東周時卽有之莊子稱相里勤之弟子是已漢
有御史武十六國前趙有偏將軍覽大都皆晉人也金墓
在小相里之北釋碑辭與五代史傳略同惟史稱字奉金
而碑云字國寶史稱贈太師而碑云贈太子太師則碑爲
可信矣案此碑舊皆作李相撰平津煎碑記謂薛視李下
當是穀字夏然李穀宋史有傳晉天福六年嘗由
太常丞加虞部員外郎據碑結銜則
先一年已爲行尚書刑部員外郎矣

聖字山崆峒巖記

天福五年 今在鳳臺縣

平津讀碑記記稱僧普閉崆峒人也崆峒是鄉鎮以巖而
得名又稱城皇信衆皇通作陞城陞猶言城內碑異文蓋
作菁冥作冥朽作朽衰作衰

鳳臺縣志碑年月下云主僧建無撰書人

昭義節度使贈尙書令韓王王建立墓碑

天福五年 陳通撰今在榆社縣西四十里魚頭村

舊通志王建立墓有碑額云大晉故推誠奉義匡運致
理功臣昭義軍節度澤潞遼沁等州觀察處置等使開
府儀同三司使持節潞州諸軍事行潞州刺史檢校太
師兼中書令 闕 一千戶贈尙書令瑯琊韓王墓銘

謹案碑敘建立所歷官與歐史本傳略同惟天福初
封臨淄王改東平王進太師兼中書令傳皆不詳耳
建立子女各一女出家法名妙慧賜號嚴因大師長
孫女亦出家法名智超賜號妙果大師並見碑中本
傳謂建立好殺晚節或浮圖法戒殺生所至人稍安
之未必非其女有以啟之也碑末稱志鵬叨承再命

聊述微猷是撰文人名志鵬而縣志署爲陳通所作
須得墨本攷之漢代刺史與牧迭更爲名故建立子
守恩官衛州刺史碑屢稱爲衛牧今俗每謂知州爲
刺史爲牧義似相沿然以姓氏冠牧金石中不數見
且今之知州亦遠非漢唐刺史比也

義成節度使贈太保史匡翰碑

天禧八年 陶穀撰闕光遠行書今在太原縣

曝書亭集史駙馬匡翰墓在太原縣東北三十里黃陵村
碑深陷於地村民語余土不可捐捐之則更深尺余強令
捐之以畚去土至一尋龜趺始露驗之則陶學士穀所撰
文也辭多駢儷其先後歷官詳矣然史稱其歷鄭州刺史
而碑不書何歟又傳美其好讀書尤喜春秋三傳與學者

講論不倦碑辭亦云懷鼓篋之心行有餘力蘊飛箝之辨似不能言不積財而但富藏書不憂家而惟思報國求諸時彥罕有倫焉則與史傳合矣

金石錄補匡翰石敬瑭之婿也尙魯國大長公主而不見於史大王父懷清王父敬思父建開皆任九府都督翰以

駙馬厯官通顯並無功績可記穹碑巨碣止署官階而已潛研堂金石跋尾右碑文尙完好惟每行之首損去五字匡翰建瑭之長子也碑於建字下空文以避晉諱而建瑭父敬思獨不避蓋當時著令止避下一字也建瑭死贈太保其祖懷清任安慶九府都督皆五代史所不載而敬思爲九府都督亦當有安慶字史省文耳朱錫鬯云史稱厯鄭州刺史而碑不書按五代史本云鄭州防禦使不云刺

史此朱氏記憶之誤余讀碑文有曰圃田待理漢殿掄才
功臣旌佐國之名出守奉專城之寄又云齋壇竣而金鼓
嚴麻案宣而油幢出控梁范之西郊殷乎威望撫國僑之
遺俗綽有政聲蓋匡翰由鄭州防禦使拜義成節度而鄭
州元在義成軍管內碑固未嘗不書也陶穀之文非比鋪
張頗爲親切而閻光遠書法圓美五季石刻如此者亦罕
矣

金石萃編按匡翰建塘之子薛史有傳歐史附建塘傳是
碑所載匡翰歷官行事頗詳惟首行功臣之上是當時賜
號碑旣缺蝕而史亦未及卒莫知其何號也碑敘歷官多
與薛史合惟匡翰由天雄軍牢城都指揮使遷檢校刑部
兼御史大夫上柱國及起復冠軍關五吾衛大將軍員外

置同正員傳所不載而其授檢校司徒以下諸職鄭州防禦使遷義成節度滑濮等州觀察處置管內河隄等使丁母憂起復本鎮碑未及縷述爲異耳至歐史則僅云應天雄軍步軍都指揮使彰聖馬軍都指揮使事晉爲懷和二州刺史鄭州防禦使義成軍節度使不及薛史之詳也碑於梁唐晉三朝除授各官皆厯厯敘出而自檢校司徒以下諸職但以漢疊接平陽之第禹河連沁水之封云云括之與通篇文例不合況後文有云依前充節度使而前此實未見節度使字樣當是撰碑時偶爾脫漏不必曲爲之說也匡翰尙魯國大長公主歐史以爲高祖之女薛史以爲高祖之妹碑云車服有容實殷帝之歸妹禮華關五之字王姬亦未能定其孰是攷高祖本紀天福七年帝崩年五

十一徐無黨注云五十二而匡翰之卒亦在是年年已四
十公主之齒當與翰相若疑從舊史爲長五代會要晉公
主不載魯國公主可據此以補其缺而金石錄補乃云匡
翰尙主不見於史何其疎歟碑爲陶穀奉勅撰書丹者閻
光遠宋史穀傳稱在晉時以李崧和疑奏爲著作卽集賢
校理改監察御史遷虞部員外郎知制誥碑題朝議郎尙
書虞部員外郎知制誥臣陶穀正其時所居之官穀傳又
云晉祖廢翰林學士兼掌內外制詞目繁委穀言多受懼
爲當時最今讀碑文敘事有體華實賅備宋史之言爲不
誣矣

重修蒙山開化寺寶嚴閣碑

開運二年 今在太原縣西蒙山法華寺

謹案碑爲劉智遠鎮河東封北平王時所立舊志作
開化寺莊嚴閣今據墨木標目云重修蒙山開化瑤
嚴閣記瑤乃古寶字之省非莊嚴也其下列撰書人
結銜云觀察判官將仕郎檢校尚書戶部郎中兼侍
御史賜紫金魚袋蘇禹珪奉命撰觀察支使朝請郎
試大理司直兼殿中侍御史蘇曉奉命書兼篆額文
末云大晉開運二年七月十三日記後書興邦佐命
忠力保定功臣北京留守河東節度管內觀察處置
等使北面行營都統開府儀同三司檢校太師兼中
書令行太師尹上柱國北平王食邑一萬三千戶實
食封二千二百戶劉智遠立石其奉命撰書命字皆
空五格文中凡前代如齊文宣後主唐高祖高宗後

唐武皇以及北平王皆跳行高一字書而大晉開運
二年字則與文連接並格不空考是時邊釁雖開成
敗未分而智遠已侈然自尊卑視晉室若此則史稱
出帝嘗疑智遠勳位已高幸晉多故而有異志非虛
語也蓋不待木拐北來而已決其不臣矣蘇禹珪薛
史有傳蘇曉見宋史此書其姓作蘇

漢

禹王廟碑

乾祐元年 舊在夏縣北十五里禹王城

夏縣志原州司馬楊榮祚撰記

景福寺重修思道和尚塔銘

乾祐二年 今在夏縣

景福寺重建思道和尚塔眾邑人記

同上

謹案二碑同時立前碑題陝府夏縣景福寺故思道和尚重修塔銘左街講論大德守澄撰將仕郎試秘書正字崔虛已書後碑皆題名也標目爲大漢陝州夏縣陽公鄉景福寺重建故思道和尚塔眾邑人記守澄文駢儷皆彼教中語中稱思道以去開德二年十二月二日示滅所闕年號當是龍德梁末帝貞明七年所改元也僅二年而亡稱前代云去見北周曹恪碑特彼文云去魏大統此並梁不書爲異也

周

節度使太子太師周密墓碑

廣順二年 舊在應州

大同府志五代周太師周密墓在州東城下莊誌石存
明萬厯間塌出州續志云攷宋史周廣傳廣之先應州
神武川人父密事晉歷鄜延綏三鎮節度使周廣順初
至太子太師致仕是周密墓在應州無疑通志疑墓係
周德威之祖未審所據然周廣順時密何由歸葬故鄉
則亦不可究詰矣

董池聖母廟碑

顯德四年 董玘撰今在聞喜縣東四十里董澤廟

聞喜志補碑兩側有字記諸村落之率錢者想碑陰亦
嘗刻字而爲金賈葵磨去另刻董父廟記矣正面僅存
文是駢體雖剝泐尙能考見大概其製文者是絳州絳

縣主將董玘中云此廟於唐大曆八年縣官再造又云
是日秦軍作亂龍女助戰又云歐陽景府爲當代之昌
榮蓋必當時有兵變之事爲歐陽氏所勦定也崇漢乾
祐元年
河中節度李守貞反鳳翔王景崇承興趙思綰共推守
眞爲秦王所謂三鎮之叛也秦軍作亂似指其事然距
立碑之時景府云者唐制府兵間喜有景山府也軍中
已十年矣秦凱感神明而修祠故主將爲之製文其董玘未知卽
邑人否然董姓皆董父之後此地董父故封子姓蕃衍
故宇文氏造像列名之邑子什九是董氏意者此君亦
邑產歟唐古碑刻新文宋元文每有之此僅磨碑陰尙
非大恨

玉兔寺現身羅漢遺語碑

顯德五年十月 今在浮山縣

志略碑爲學究王福新撰在風穴山禪藥菴後唐武德二
年平陽西北今汾西地有玉兔見遣使祭之勅建玉兔觀
麟德初免復見勅增修萬歲通天二年免又見履空而行
遣中使王文恭求獲玉兔偕平陽守杜承衍躬往兔出徐
步趁之經數日兔至平陽東神山縣西南隅而隱卽隱處
穿地丈餘獲玉石兔上貢命送玉兔觀長安二年河東路
巡按使刑部尙書李景副使王永署平陽守錢光演同遊
觀中於風穴山腳下見一僧引十餘巨虎頂放白光言此
地有虎患吾伏之告以姓氏言訖而化因奏改觀音寺後
唐清泰二年正月十八日獵人見玉兔入穴掘之見菴門
啟視之容像如生有羅漢現身此與龍角山老君書見
事同一誕幻不經蓋其
士俗習爲妖妄奸人因之以爲奸利耳而一時之君若臣
子交售其欺而不悟其詐是可笑也不然何老聃佛祖獨

於浮山縣爲
此紛紛哉

北漢

普照寺碑

天會中 今在臨縣南八十里招賢村文剝落見縣志

太師中書令定王劉繼顯碑

廣運元年 舊在五臺縣臺山

十國春秋楊夢申天會時累官右諫議大夫能文章尤長於碑記十七年奉勅撰定王繼顯神道碑文不加點典而有則朝士多稱賞之繼顯故燕王劉守光子也守光之死以孽子得不殺削髮爲浮圖居五臺山爲人多智數善商財利自世祖時頗已賴之睿宗嗣位用宗姓例拜鴻臚卿繼顯能講華嚴經手執香如意紫檀鑲成芬馨滿室四方

爭爲供施多積蓄以佐國用五臺當契丹界上糴廩常得其馬以獻號添都馬歲率數百匹又遊華嚴見地有寶氣乃於團柏谷案團字衍柏谷在五臺山北團柏谷北漢時爲隆州地在今祁縣東置銀冶募民鑿山取礦烹銀官收十之四國用多於此取給卽其地建寶興軍英武帝立加副都統進太師兼中書令天會十七年卒追封定王

天龍寺千佛樓碑

廣運二年八月 今在太原縣西南三十里天龍廟

曝書亭集丙午二月登天龍之山得北漢李暉所爲千佛樓碑異焉俾工搨歸裝潢之書其後曰北漢之爲國不足當一大郡而王朴以爲必死之寇亡最後自周之世宗宋之太祖百戰不能克宜其君臣有過人之才而劉繼元處

裏瘡吮血之餘輕役其民命嬖臣范超冶金爲佛治不急
之務憚身爲相臣不能匡正惟事圍棊飲酒反撰碑文侈
大其事何歟碑稱承鈞爲睿宗皇帝繼元爲英武皇帝皆
史記所未及劉崇之語張元徽也顧我是何天子爾亦是
何節度使然則憚之夸大其辭適足以形其陋而已攷繼
元之立在宋開寶元年戊辰史稱其卽位時改元廣運而
碑建於乙亥故其文曰上御字之八年後舊廣運二年歲
次乙亥按楊夢中撰劉繼顯神道碑亦稱廣運元年歲次
甲戌與是碑合則卽位改元之說史未得其詳矣繼元殘
忍好殺具書於史然當時諸臣率棄之降宋范超亦降惟
憚至國亡乃降蓋其誅戮亦所必行無足深罪者嗚呼以
茲爾之地抗百萬之師民爭爲之效死其君臣豈真無過

人之才者哉若其文格之卑書法之陋攷古之士無諱焉可也

潛研堂金石跋尾右天龍寺千佛樓碑李暉奉勅撰文劉守清書王廷譽篆額暉以宰相奉勅撰文列名碑文之前守清廷譽則列名於碑末年月一行之下不稱臣亦不云奉勅徵之也吳任臣十國春秋載此碑頗多闕文今得石本校之可識者尙廿許字舛誤者又數字始歎博聞之家又以審核爲難耳

金石萃編按碑前題推誠佐命保祚功臣特進守尙書左僕射兼中書侍郎平章事上柱國隴西郡開國公食邑三千戶臣李暉奉勅撰末題翰林書令史劉守清書翰林書令史王廷譽篆額十國春秋北漢李暉傳暉字孟深汴州

陽武人乾祐初第進士歷仕睿宗父子文詞駢儷見推流
輩英武帝時天龍寺千佛樓成詔暉撰碑銘而命翰林令
劉守清王廷譽勒文於石一時無不歎絕卽此碑也傳載
暉歷官多與碑符惟劉守清王廷譽二人碑稱翰林書令
史而傳但作翰林令爲異檢十國百官表北漢有翰林令
史不應傳中單稱翰林令當由傳刻脫去史字耳碑立於
廣運二年乙亥八月廣運爲劉繼元僞號乙亥爲宋開寶
八年五代史北漢世家案五代史作東漢云劉承鈞改乾祐十年
曰天會元年承鈞立十三年卒繼恩立九月侯霸榮等殺
之迎立繼元改元曰廣運攷通鑑周世宗顯德四年丁巳
北漢大赦改元天會顯德七年恭帝禪宋是爲太祖建隆
元年則天會十三年乃開寶二年己巳是年繼元卽改廣

運則廣運二年當爲庚午歲矣與碑所題歲次乙亥者不合十國春秋深論五代史之誤其編漢年則書睿宗乾祐九年改明年爲天會元年又十二年睿宗殂少帝英武帝並不改元至十七年始改明年爲廣運元年以甲子計之年適當乙亥歲吳氏并引楊夢申所撰定王劉繼顯碑末署廣運元年歲次甲戌亦與此碑吻合然則歐史之誤顯然吳氏得據諸碑正之金石之有功於史政非淺也

右五代碑碣